

Broj: 06-03-660-16/21/15
Mostar, 18.02.2016. godine

Na osnovu člana 21., člana 37., člana 42., člana 84. i člana 87. stav (1) i stav (2) Zakona o električnoj energiji u Federaciji Bosne i Hercegovine („Službene novine Federacije BiH“ broj 66/13 i 94/15), člana 20. stav (2) Zakona o korištenju obnovljivih izvora energije i efikasne kogeneracije („Službene novine Federacije BiH“ 70/13 i 5/14), člana 20. stav (1) i člana 23. stav (1) Statuta Regulatorne komisije za energiju u Federaciji Bosne i Hercegovine („Službene novine Federacije BiH“ broj 24/14 i 91/15), člana 8. stav (1), člana 32. stav (4) i člana 42. stav (1) Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 29/14), člana 78. Pravilnika o javnim raspravama i rješavanju zahtjeva, sporova i žalbi („Službene novine Federacije BiH“ broj 57/12 i 71/14), člana 20. Pravilnika za izdavanje dozvola („Službene novine Federacije BiH“ broj 43/14), člana 10. stav (3) i člana 13. stav (2) Pravilnika o sticanju statusa kvalifikovanog proizvođača električne energije („Službene novine Federacije BiH“ broj 53/14), postupajući po Zahtjevu za obnovu dozvole za rad za proizvodnju električne energije broj 06-03-660/21/15 od 20.07.2015. godine podnosioca zahtjeva „ESKIMO S 2“ Travnik d.o.o., Regulatorna komisija za energiju u Federaciji Bosne i Hercegovine – FERK je dana 18.02.2016. godine na II redovnoj sjednici donijela sljedeće

RJEŠENJE

1. Izdaje se Dozvola za rad za proizvodnju električne energije podnosiocu zahtjeva „ESKIMO S 2“ Travnik d.o.o.
2. Utvrđuje se „ESKIMO S 2“ Travnik d.o.o. status kvalifikovanog proizvođača u proizvodnim objektima mHE „Podstinje“, mHE „Vileška“, mHE „HUM“ i mHE „DUBOKO“, u periodu važenja dozvole iz tačke 3. ovog rješenja.
3. Dozvola za rad izdaje se na period od 18.02.2016. godine do 17.02.2026. godine, sa uslovima dozvole koji čine njen sastavni dio.
4. Sastavni dio ovog rješenja čini dozvola iz tački 1.i 3. ovog rješenja.
5. Imalac dozvole je obavezan plaćati regulatornu naknadu tromjesečno, u periodu važenja dozvole i u iznosu koji utvrdi FERK posebnom odlukom.
6. Ovo rješenje je konačno i stupa na snagu danom donošenja, te se objavljuje na oglasnoj tabli i internetskoj stranici FERK-a, a dispozitiv ovog rješenja u „Službenim novinama Federacije BiH“.

Obrazloženje

FERK je 20.07.2015. godine primio od podnosioca „ESKIMO S 2“ Travnik d.o.o. Zahtjev za obnovu dozvole za rad za proizvodnju električne energije broj 06-03-660/21/15.

Prilikom pregleda potpunosti podnesenog zahtjeva, u skladu sa članom 9. Pravilnika o javnim raspravama i rješavanju zahtjeva, sporova i žalbi, FERK je utvrdio da podneseni zahtjev nije potpun u smislu člana 12. Pravilnika za izdavanje dozvola.

Zbog navedenog, FERK je postupajući u skladu sa članom 10. Pravilnika o javnim raspravama i rješavanju zahtjeva, sporova i žalbi dostavio podnosiocu zahtjeva

Obavještenje o nedostacima podnesenog Zahtjeva za obnovu dozvole za rad za proizvodnju električne energije broj 06-03-660-01/21/15 od 19.08.2015. godine, te mu odredio rok radi otklanjanja u obavještenju naznačenih nedostataka i upozorio ga na posljedicu propuštanja.

Postupajući po obavještenju, podnosilac zahtjeva je dostavio dopis primljen u FERK 02.09.2015. godine pod brojem 06-03-660-02/21/15, uz koji je dostavio dio tražene dokumentacije i obrazloženja. U cilju cjelovitog upotpunjavanja dostavljene dokumentacije, FERK je podnosiocu zahtjeva 06.10.2015. godine dostavio Zahtjev za informacijama broj 06-03-660-03/21/15, povodom kojeg je podnosilac zahtjeva dostavio 05.11.2015. godine FERK-u dopis primljen pod brojem 06-03-660-04/21/15, te ponovno 13.11.2015. godine dopis primljen pod brojem 06-03-660-05/21/15. FERK je podnosiocu zahtjeva uputio 18.11.2015. godine i Zahtjev za informacijama broj 06-03-660-06/21/15, povodom kojeg je podnosilac zahtjeva dostavio 08.12.2015. godine FERK-u dopis primljen pod brojem 06-03-660-07/21/15, te 10.12.2015. godine dopis primljen pod brojem 06-03-660-08/21/15, uz koje je dostavio traženu dokumentaciju i obrazloženja.

Postupajući u skladu sa članom 15. Pravilnika za izdavanje dozvola, FERK je 22.12.2015. godine u „Oslobođenju“ i na svojoj internetskoj stranici objavio Obavještenje za javnost o podnesenom Zahtjevu za obnovu dozvole za rad za proizvodnju električne energije podnosioca zahtjeva „ESKIMO S 2“ Travnik d.o.o..

Povodom Obavještenja za javnost, FERK do roka naznačenog u obavještenju odnosno do 30.12.2015. godine do 12:0000 sati, nije primio pisane komentare zainteresovanih lica na podneseni zahtjev, niti su podneseni zahtjevi za sticanje statusa umješaća.

Uzimajući u obzir navedeno, kao i podnesene dokaze i činjenice uz zahtjev, FERK je u skladu sa članom 55. Pravilnika o javnim raspravama i rješavanju zahtjeva, sporova i žalbi, obavijestio podnosioca zahtjeva o svojoj namjeri provođenja postupka izdavanja dozvole bez održavanja formalne rasprave, putem Obavještenja 06-03-660-10/21/15 od 30.12.2015. godine i kojom mu je data mogućnost da ukoliko raspolaže novim činjenicama u vezi sa predmetom postupka, iste predstavi, odnosno uputi svoje komentare FERK-u do naznačenog roka. U vezi sa navedenim obavještenjem, da se postupak izdavanja dozvole provede po skraćenom postupku, podnosilac zahtjeva nije iznio nove činjenice u vezi sa predmetom postupka, te nije uputio druge komentare FERK-u.

Na osnovu provedenog postupka tokom kojeg je izvršena pažljiva analiza svih činjenica i podnesenih dokaza na osnovu kojih se moglo utvrditi stanje stvari, FERK je u skladu sa članom 17. stav (2) i stav (3) Pravilnika za izdavanje dozvola, pripremio Nacrt dozvole za rad za proizvodnju električne energije po zahtjevu broj 06-03-660/21/15 od 20.07.2015. godine, podnosioca „ESKIMO S 2“ Travnik d.o.o.. Na osnovu člana 92. stav (2) Zakona o električnoj energiji u Federaciji Bosne i Hercegovine, FERK je Odlukom broj 06-03-660-12/21/15 od 29.01.2016. godine usvojio Nacrt dozvole za rad za proizvodnju električne energije, dok je Odlukom FERK-a broj 06-03-660-13/21/15 od 29.01.2016. godine ovaj nacrt upućen u proces javne rasprave, te je određeno mjesto, datum i vrijeme održavanja opšte rasprave o predmetnom Nacrtu dozvole za rad za proizvodnju električne energije, imenovan voditelj postupka i zamjenik voditelja postupka, kao i da zainteresovana lica svoje usmene komentare na Nacrt dozvole za rad za proizvodnju električne energije mogu dati na opštoj raspravi koja je održana 08.02.2016. godine u 12:00 sati, u prostorijama Opštine Travnik u Travniku, a pisani komentari su se mogli dostaviti na adresu FERK-a ili

na elektronsku adresu, u periodu od 30.01.2016. godine do 09.02.2016. godine do 12:00 sati.

Opštoj raspravi o Nacrtu dozvole za rad za proizvodnju električne energije prisustvovali su predstavnici FERK-a i podnosioca zahtjeva. Podnosilac zahtjeva je istakao da nema primjedbi na predloženi tekst Nacrta dozvole, kao i da će „ESKIMO S 2“ Travnik d.o.o. ispuniti sve dozvolom postavljene uslove.

Do ostavljenog roka za dostavu pisanih komentara, odnosno do 09.02.2016. godine do 12:00 sati, u FERK nisu primljeni pisani komentari na Nacrt dozvole za rad za proizvodnju električne energije.

U skladu sa članom 26. stav (2) Pravilnika o javnim raspravama i rješavanju zahtjeva, sporova i žalbi, a na osnovu održane opšte rasprave, voditelj postupka pripremio je pisani izvještaj, koji je sadržavao kratak pregled toka rasprave, zapisnik sa opšte rasprave, komentare, analizu datih komentara i preporuke, te je iste uputio podnosiocu zahtjeva na komentare 10.02.2016. godine pod brojem 06-03-660-14/21/15.

Podnosilac zahtjeva je povodom navedenog FERK-u dostavio 11.02.2016. godine dopis primljen u FERK pod brojem 06-03-660-15/21/15, u kojem je naveo da je saglasan sa izvještajem voditelja javne rasprave, te da Nacrt dozvole za rad nema primjedbi.

Izvještaj voditelja postupka sa komentarima podnosioca zahtjeva dostavljen je članovima FERK-a dana 12.02.2016. godine pod internim brojem 06-08-95/16, na razmatranje radi donošenja odluke.

Na osnovu obrade Zahtjeva za obnovu dozvole za rad za proizvodnju električne energije podnosioca „ESKIMO S 2“ Travnik d.o.o. i dokumentacije priložene uz zahtjev, utvrđeno je da podnosilac zahtjeva ispunjava kriterije za izdavanje dozvole za rad za proizvodnju električne energije i za sticanje statusa kvalifikovanog proizvođača u skladu sa Zakonom o električnoj energiji u Federaciji Bosne i Hercegovine i Zakonom o korištenju obnovljivih izvora energije i efikasne kogeneracije, te Pravilnikom za izdavanje dozvola i Pravilnikom o sticanju statusa kvalifikovanog proizvođača električne energije.

Na osnovu navedenog, kao i analize postupka opšte rasprave, odnosno izvještaja voditelja postupka i komentara podnosioca zahtjeva na izvještaj voditelja postupka, u dozvoli koja je predmet ovog rješenja podnosiocu zahtjeva postavljeni su, u skladu sa članom 32., članom 33. Pravilnika za izdavanje dozvola i članom 13. stav (1) Pravilnika o sticanju statusa kvalifikovanog proizvođača električne energije, određeni uslovi. Spomenuti uslovi uvažavaju potrebu, ali i obavezu „ESKIMO S 2“ Travnik d.o.o., da u rokovima propisanim u uslovima dozvole za rad za obavljanje licencirane djelatnosti proizvodnje električne energije iste ispuni, u cilju zadovoljenja propisanih kriterija.

Na osnovu navedenog, odlučeno je kao u dispozitivu ovog rješenja.

POUKA O PRAVNOM LIJEKU:

Protiv ovog rješenja podnosilac zahtjeva može tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana prijema rješenja. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

v.d. PREDSEDNICE FERK-a
Sanela Pokrajčić